

DOMENIE II «VIE PAL AN»

Jutoris pe Liturgjie

Domenie, ai 19 di Zenâr dal 2020

Domenie passade Gjesù nus è stât presentât tal Batisim come un vêr om vignût a dânus une man, un servidôr fedêl; e intant e rivà dal cîl une vôs ch'e diseve: Chel chi al è gno Fi il preferît.

Chel stes Gjesù Fi di Diu e nestri servidôr al ven vuê paragonât a un agnel. Di fat Zuan Batiste al viôt Gjesù e al dîs: Ve l'agnel di Diu, ch'al gjave il pecjât dal mont. Te Bibie il simbul dal agnel al è di fonde e lu cjatin tai moments tragjics e epics de storie dai Israelits come tes liturgiis di ogni dì tal templi di Gjerusalem.

Fin îr l'altri l'agnel al jere di cjase e di famee ancje tai paîs dal nestri Friûl intant che vuê soledut lis gnovis gjenerazions nancje no varan tocjât un agnel di polpe e di vues. Di fat, almancul pal moment, e fâs bieles figure la ilusorie ecologjie dai blog multimediâi intant che si continue a devastâ la tiere. Ce isal di dî? Il mont al va cussì.

In chescj agns noaltris o vivin tune societât simpri plui individualiste e cence ponts di riferiment; tune glesie che in alt fra intervistis e intervents e piert ogni dì in autoritât e autorevolece; tun aiar di "nichilism" venastâi "ancje se o ves dut, no mi interesse di nuie".... In pocjîs peraulis, si cjatìn tun mont fumul e licuît li che il simbul di Gjesù-agnel al è propit ce che il cûr al cûr:

un Gjesù-agnel te sô inocence, mitece, bontât, sotmission, debolece, ubidience ma soledut pront a lassâsi sacrificâ par nô; cence smenteâ la realtât "dal lôf e dal agnel" cun dut ce che di sacrosante opare di justizie e di liberazion une tâl violence e compuarte.

Pensantle ben, o podìn ridusi dut chest a une sole uniche peraule: "umanitât"; li che Gjesù-Agnel di Diu al è il grant mestri che al educa no a la "umanitât" imponude de leç ma a chê che e florîs tal cûr.

Vuê in timp di messe, intant che o disìn agnel di Diu che tu cjapîs sù i pecjâts dal mont, cirìn di domandâ: "Signôr no sta permeti che o vebi di ridusimi al mecanisim di un robot computerizât"; e intant che o scoltìn prime de comunion Velu chi l'agnel di Diu: "Signôr dolcîs il gno cûr par imparâ di te a nudrî ce che di plui biel o varès di custodî: la mê umanitât; pal ben gno, dal nestri Friûl e dal mont intîr".

Antifone di jentrade

Sal 65,4

Denant di te si plee dute la tiere
e al to non e cjante, o Altissim.

Colete

Diu onipotent e eterni,
che tu rezis tant lis robis dal cîl che chês de tiere,
scolte cun boncûr lis preieris dal to popul
e regalinus la pâs ai nestris dîs.
Pal nestri Signôr Gjesù Crist to Fi, ch'al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE

Is 49,3.5-6

Ti fasarai lûs dai forescj, par che tu puartis la mê salvece.

Il toc che o scoltìn al aparten ai Cjants dal servidôr di Jahvè li che si lei: tant che un agnel menât al macel.... (Is 53, 7). Di chest Gjesù - agnel di inocence, di bontât, di umanitât, si dîs culi: ti fasarai lûs dai forescj, par che la mê salvece e rivi fin tai ultins confins de tiere.

Al è ce che o cjantarìn te solenitât di Pasche: Al agnel sacrificât sot il pès de nestre colpe / al Signôr resussitât che dal cîl nus vierç la puarte, / dut il mont al jevi il cjant al Signôr trê voltis sant.

Da libri dal profete Isaie

Il Signôr mi à dite: «Tu sês il gno servidôr, Israel,
e midiant di te o fasarai viodi la mê glorie».
E cumò, al dîs il Signôr,
che dal grim di mê mari mi à dât dongje
par ch'o sedi il so servidôr,
par tornâ a menâi dongje Jacop
e par metii adun Israel,
– e o soi stât alçât denant dai vôi dal Signôr
e il gno Diu al è stât la mê fuarce –
e al disè: «Al è pôc che tu sedis gno servidôr,
par tornâ a tirâ sù lis tribûs di Jacop
e par tornâ a menâ dongje chei ch'a son restâts di Israel;
par chel ti fasarai lûs dai forescj,
par che la mê salvece
e rivi fin tai ultins confins de tiere».
Peraule di Diu.

SALM RESPONSORIÂL

dal Salm 39

Se chest salm al jes de bocje di un piu israelit plen di devozion, se Gjesù lu varà fat so e cui sa cetants voltis che lu varà preat cun dut il so cûr, anime, ment e fuarce (cf. Mc 12, 30) e, se al è il salm dai sants che te lôr vite a àn cirût dome la volontât di Diu, che al deventi ancje nestri e che ancje nô o podìn dî cun cûr, anime, ment e fuarce:

R. Ve chi ch'o soi, Signôr, par fâ la tô volontât.

Se cjantât: Il cjant dai salms responsoriâi, p. 52.
O ai metude tal Signôr dute la mê sperance,
lui si è pleât viers di me
e al à scoltât il gno berli.
Al à metût su la mê bocje une cjante gnove,
une laut al nestri Diu. **R.**

Tu no tu bacilis par sacrificis e par ufiertis,
tu mi âs vierzût pulît lis orellis!
Olocauscj e sacrificis pal pecjât no tu domandis.
Alore o ai dite: «Ve chi ch'o soi! **R.**

Al è scrit sul gno cont tal rodul dal libri
che la tô volontât o fasi.
Sì, Diu gno, o vuei fâle:
la tô leç le ai dentrivie». **R.**

O conti la tô justizie te grande semblee.
Ve, jo no ten sierâts i miei lavris:
tu lu sâs, Signôr. **R.**

SECONDE LETURE

1 Cor 1,1-3

Gracie a vualtris e pâs di Diu nestri Pari e dal Signôr Gjesù Crist.

Vuê la liturgjie e comence la prime letare di san Pauli ai Corints. L'apuestul le scrîf tor dal 57 e si cjate a Efeso, in Asie minôr, lontan di Corint che e je in Grece. La comunitât di Corint e veve tantis dificoltàts e l'Apuestul i steve dongje come un cjan vuardean fedêl che se al ocor al bauche e... al muart. In chest moment, scoltant l'apuestul, si cjatìn ancje nô cun ducj chei che in ogni lûc a prein il non dal Signôr e duncje che e vegni ancje sore di nô grazie e pâs di Diu nestri Pari e dal Signôr Gjesù Crist.

De prime letare di san Pauli apuestul ai Corints

Pauli, clamât par volontât di Diu a jessi apuestul di Crist Gjesù, e il fradi Sostene, a la Glesie di Diu ch'è je a Corint, ai santificâts in Crist Gjesù clamâts a jessi sants cun ducj chei che in ogni lûc a prein il non dal Signôr nestri Gjesù Crist, Signôr nestri e lôr: grazie a vualtris e pâs di Diu nestri Pari e dal Signôr Gjesù Crist.

Peraule di Diu.

CJANT AL VANZELI

Zn 1,14.12

R. Aleluia, aleluia.

E il Verbo si è fat cjar

e al è vignût a stâ framieç di nô.

A di chei che lu an acetât

ur à dât il podê di diventâ fîs di Diu.

R. Aleluia.

VANZELI

Zn 1,29-34

Ve l'agnel di Diu, ch'al gjave il pecjât dal mont.

Po Zuan al testimoneà *che su Gjesù - tal simbul dal Agnel e te sô umanitât - o ai viodût il Spirt a vignî jù, che lui, al è chel ch'al batiè cul Spirtu Sant e che lui al è il Fi di Diu.*

Ma chest cu la lôr vite, lu àn testimoneât ancje i apuestui, ancje i sants, ancje i juscj / justis dai nestris paîs. Insedâts te umanitât di Crist, podessino testimoneâlu ancje nô.

Al è ce che di plui prezios la persone dongje, cence vierzi la bocje, nus domande parcè che plui e sint la dibisugne.

Dal vanzeli seont Zuan

In chê volte, Zuan al viôt Gjesù a vignî incuintri e al dîs: «Ve l'agnel di Diu, ch'al gjave il pecjât dal mont. Chel chi al è chel che jo o disevi di lui: Chel ch'al ven dopo di me al è passât denant di me parcè che al jere prime di me. Jo no lu cognossevi, ma o soi vignût a batiâ cu l'aghe propit par ch'al fos pandût a Israel». Po Zuan al testimoneà: «O ai viodût il Spirt a vignî jù sore di lui come une colombe e a fermâsi sore di lui. E jo no lu cognossevi, ma chel che mi à mandât a batiâ cu l'aghe mi à dit: Chel che tu viodarâs il Spirt a vignî jù e a fermâsi sore di lui, al è chel ch'al batiè cul Spirtu Sant. E jo lu ai viodût e o ai testimoneât che lui al è il Fi di Diu».

Peraule dal Signôr.

Su lis ufiertis

Danus la grazie, Signôr,

di celebrâ chescj misteris dispès e cun fede,

parcè che ogni volte che si fâs memorie di chest sacrifici

si colme la vore de nestre redenzie.

Par Crist nestri Signôr.

Antifone a la comunion

Sal 22,5

Tu prontis denant di me une taulade
e il gno bocâl al è plen ch'al stranfe.

O ben:

1 Zn 4,16

Nô o vin ricognossût e crodût al amôr che Diu al à par nô.

Daspò de comunion

Met in nô, Signôr, il spirt dal to bonvolê,
par che, sostentâts cul unic pan dal cîl,
o sedin unîts intun unic amôr.
Par Crist nestri Signôr.

* * *

Cjants

- Fradis miei, *n. 54*
 - Vegnît a cene, *n. 152*;
 - Come a l'aghe de fontane, *n. 135*;
 - Da font de mê anime, *n. 320*;
 - e altris cjants des domeniis Vie pal an.
-
- In particular: fin a la Presentazion di Gjesù al templi - Cjandelarie (2 di Fevrâr):
 - Lui al è la lûs vere, *n. 123* cul salm 112 "Laudait fameis dal Signôr", *n. 264*.
 - Sot la tô protezion, *n. 124*.

* * *

Doman, lunis, al è l'aniversari di pre Pauli Varut (21.11.1943 - 20.01.1985).

Recuie eterne Signôr pai nestris muarts

e benedete la tiere che tu fâs.

Amen.

* * *

Par une cuestion di justizie, di veretât, di onestât, di transparence

no podin concludi lis riflessions su **Gjesù agnel di Diu** cence ricuardâ il verset (53, 7) dal profete Isaie:

***Maltratât, lui si è umiliât
e nol à vierzude bocje;
tant che un agnel menât al macel,
tant che une piore ch'e tâs denant di chei che le tosin
nol à vierzude bocje.***

In chest moment si riferin a lis vitimis di numar cence fin, umiliadis, tormentadis, torturadis, violentadis e copadis de strafotence di un clericalisim glesiasc durât tai secui. Abûs di autoritât, di magjisteri, di cussience, di peraule, di sessualitât e di ogni altri gjenar. Soredut i piçui e i minôrs, vitimis di un sisteme che al à tormentade la int cun spavents e cjastics di chest e di chel altri mont.

A valin ancje par lôr, insedâts cul sacrament dal Batisim in Crist (*Rm 6, 3*), lis peraulis dal Signôr a S. Pauli su la strade di Damasc (*Ats 9, 4-5*):

"Saul, Saul, parcè mo mi perseguitistu?". Al domandà: "Cui sêstu, Signôr?". E lui: "Jo o soi chel Gjesù che tu tu perseguitis".

La glesie e à grandis lûs ma anje grandis ombris.

Al è par misericordie di Diu se si è ancjemò ca e a valin tes umiliazioms dal sisteme glesiastic lis peraulis di sperance e di consolazion des Lamentazions (3, 22-23. 26):

***“Lis graciis dal Signôr”, che no son finidis,
e il so boncûr, che no si à suiât.
A tornin a diventâ gnovis ogni buinore:
ce grande che e je la sô fedeltât!
Al è ben spietâ, e tal cidin,
la salvece dal Signôr.***

Al è propit cussi:

***Al è ben spietâ, e tal cidin, in pinitince - cul cjâf bas, la salvece dal Signôr.
Amen***

* * *

Domenie de Peraule di Diu

Pape Francesc al à volût istituî la Domenie de Peraule di Diu, zornade che te nestre diocesi za e veve zerminât ai timps dal Vescul mons A. Battisti. E durà cualchi an e po si smamî vie.

Chi di noaltris la fieste de peraule di Diu e à dirit di jentrâ cun dignitât dome se la Bibie e ven lete te marilenghe, tal rispjet e pe liberazion dal nestri popul e tune liturgjie di tradizion aquileiese cun tant di Messâl par furlan; ma in chest sens pal moment no si viodin ni iniziativis diocesanis miradis, ni lusorons di sorte.

De Letare apostoiche ***“APERUIT ILLIS”***

di pape Francesc

pe istituzion de

DOMENIE de PERAULE di DIU

Alore ur vierzè la ment par lâ a font des Scrituris

«Aprì loro la mente per comprendere le Scritture» (Lc 24,45). È uno degli ultimi gesti compiuti dal Signore risorto, prima della sua Ascensione. Appare ai discepoli mentre sono radunati insieme, spezza con loro il pane e apre le loro menti all'intelligenza delle Sacre Scritture.

(.....) A conclusione del *Giubileo straordinario della misericordia* avevo chiesto che si pensasse a «una domenica dedicata interamente alla Parola di Dio, per comprendere l'inesauribile ricchezza che proviene da quel dialogo costante di Dio con il suo popolo» (Lett. ap. *Misericordia et misera*).

(.....) Dedicare in modo particolare una domenica dell'Anno liturgico alla Parola di Dio consente, anzitutto, di far rivivere alla Chiesa il gesto del Risorto che apre anche per noi il tesoro della sua Parola perché possiamo essere nel mondo annunciatori di questa inesauribile ricchezza. Tornano alla mente in proposito gli insegnamenti di Sant'Efrem: «Chi è capace di comprendere, Signore, tutta la ricchezza di una sola delle tue parole? È molto di più ciò che sfugge di quanto riusciamo a comprendere. Siamo proprio come gli assetati che bevono a una fonte. La tua parola offre molti aspetti diversi, come numerose sono le prospettive di quanti la studiano. Il Signore ha colorato la sua parola di bellezze svariate, perché coloro che la scrutano possano contemplare ciò che preferiscono. Ha nascosto nella sua parola tutti i tesori, perché ciascuno di noi trovi una ricchezza in ciò che contempla» (*Commenti sul Diatessaron*, 1, 18).

(.....) Stabilisco, pertanto, che la III Domenica del Tempo Ordinario sia dedicata alla celebrazione, riflessione e divulgazione della Parola di Dio.

Le comunità troveranno il modo per vivere questa *Domenica* come un giorno solenne. Sarà importante, comunque, che nella celebrazione eucaristica si possa intronizzare il testo sacro, così da rendere evidente all'assemblea il valore normativo che la Parola di Dio possiede.

(.....) La Bibbia non può essere solo patrimonio di alcuni e tanto meno una raccolta di libri per pochi privilegiati. Essa appartiene, anzitutto, al popolo convocato per ascoltarla e riconoscersi in quella Parola. La Bibbia è il libro del popolo del Signore che nel suo ascolto passa dalla dispersione e dalla divisione all'unità. La Parola di Dio unisce i credenti e li rende un solo popolo.

(.....) La domenica dedicata alla Parola possa far crescere nel popolo di Dio la religiosa e assidua familiarità con le Sacre Scritture, così come l'autore sacro insegnava già nei tempi antichi: «Questa parola è molto vicina a te, è nella tua bocca e nel tuo cuore, perché tu la metta in pratica» (*Dt* 30,14).

Dato a Roma, presso San Giovanni in Laterano, 30 Settembre 2019.

Memoria liturgica di San Girolamo nell'inizio del 1600° anniversario della morte.

Francesc

* * *

* *I cjants, salms e cjantadis a vegnin ripuartâts cu la numerazion dal libri: Hosanna, Cjants e dal popul furlan, Ed. Glesie Furlane, 2012.*

* *Il cjant dai salms resposoriâi, Ed. Glesie Furlane, 2012.*

* *Par domandâ chescj libris scrivêt a info@glesiefurlane.org*